

Banco Central di Aruba ta lansa encuesta tocante e status bancario y comportacion di pago

Pa amplia su conocemento riba e aspecto di pagonan relata na inclusion financiero na Aruba, Banco Central di Aruba (BCA) lo tene un encuesta digital tocante e status bancario y comportacion di pago for di 4 di Februari 2025 te cu 25 di Februari 2025.

E meta di e encuesta aki ta pa evalua e grado cu cuentanan bancario ta prevalece bao di residentenan na Aruba, explora e motibonan pa tin of no tin un cuenta bancario na un banco comercial local y compara e comportacion di pago di individuonan cu y sin cuenta bancario.

E informacion obteni lo asis-

ti BCA pa haya bista riba e grado di acceso na cuentanan bancario, identifica gruponan cu posiblemente ta exclui y haya mas informacion riba obstaculonan pa acceso na un banco. BCA lo analisa con individuonan cu y sin cuenta bancario ta mancha nan finanzas, cu por revela tendencianan y preferencianan importante. Adicionalmente, e informacion aki lo yuda formula maneho pa reduci bareranan y mehora acceso na servicionan di pago.

E encuesta ta estrictamente anonimo y tur informacion obteni lo ta clasifica como confidencial y uza solamente pa metanan estadistico y pa maneho.

BCA ta encurasha tur residente di Aruba cu tin 18 aña of mas, pa completa e encuesta aki. Pa por participa, bishita e website di BCA www.cba-ruba.org, pagina di Instagram 'Centrale Bank van Aruba' y e pagina di Facebook 'Aruba su Florin'. Tambe por scan e QR code of click riba e link di e encuesta <https://www.surveymonkey.com/r/BankingStatusesPaymentBehaviors> pa haya acceso directo na e encuesta. Si tin cualkier pregunta adicional, por fabor tuma contacto cu e Departamento di Sistemanan di Pago di BCA via email payment.systems.department@cba-ruba.org.



Presidente di Parlamento, Gerlien Croes:

No por inicia proceso di tratamiento di presupuesto sin Nota di Contestacion di gobierno

Recientemente, Colegio di Supervision Financiero (CAft) a publica un carta dirigi na presidente di parlamento di Aruba, Sra. Gerlien Croes, tocante e tardansa den proceso di presupuesto 2025. Segun presidente di parlamento a informa mediante un comunicado di prensa, motibo di e atraso ta cu Gobierno no a manda un Nota di Contestacion riba e presupuesto na Parlamento.



Manera Bon Dia Aruba a reporta e siman aki, presidente di Colegio di Supervision Financiero, Lidewijde Ongerling a resalta e hecho cu no a aproba presupuesto 2025 den Parlamento, y ta adverti riba e consecuencianan fiscal y legal di esaki.

"Ley Temporal di Supervision Financiero di Aruba (LAft) ta stipula cu Aruba mester entrega e presupuesto aproba pa e proximo aña fiscal na e Colegio di Supervision Financiero (CAft) pa conseho prome cu dia 15 di december. Esaki ta sigura cu un presupuesto legalmente valido ta na vigor for di dia 1 di januari," Ongerling ta menciona den e carta. Sinembargo, e ta nota cu te fecha di e carta, 31 di januari, CAft no a ricibi e presupuesto aproba pa 2025. E carta ta nota cu segun Artículo 13, paragraf 1 di LAft, a informa Consejo di Minister di Reino di e asunto aki.

"Ausencia di un presupuesto aproba no ta afecta solamente e autoridad presupuestario di Parlamento, pero tambe por tin consecuencianan financiero mas amplio, manera restriccion riba drenta den compromisonan financiero nobo. Esaki ta preocupante, ya cu Aruba no lo por haci prestamonan nobo mientras ta enfrente un obligacion di pago di un debe di aproximadamente Afl. 600 miyon na 2025," Ongerling ta adverti.

"Adicionalmente, dia 1 di januari 2025, sin intervencion parlamentario, a implementa un cambio mayor den impuesto riba entrada y salario (resultando den un perdida structural di entrada di Afl. 50 miyon)," e carta ta menciona, notando cu Aruba tin "suficiente capacidad pa implementa un medida asina."

Sinembargo, ta nota cu pa

por garantiza un proceso presupuestario bon organisa, ta preferible pa entrega e implicacionnan financiero di e cambio aki na Parlamento mediante un Nota di Amienda. "Minister di Finanzas y Cultura a indica cu ta tumando stapnan pa atende e asunto como parti di e discusion di presupuesto den Parlamento.

"Den e contexto aki, CAft ta resalta un gap potencial den legislacion cu por mina politica fiscal sostenible. Cambionan di politica cu impacto financiero, tanto den termino di entrada como gasto, mester keda aproba pa Parlamento di antemano.

"E marco legal aki ya ta regula e proceso di aprobacion pa compromisonan di gasto. CAft ta conseha pa evalua con e rekisito aki tambe por ta hancra den legislacion pa cambionan di politica cu tin

consecuencia financiero riba entrada. Esaki ta un problema structural y ta independiente di e discusion di presupuesto 2025.

"Den añanan recién, Aruba a tuma stapnan significante pa mehora su proceso presupuestario. Ta crucial pa continua e progreso aki y sigura un proceso presupuestario ordena. E formacion di un gobierno nobo no mester causa retraso," e carta ta conseha.

Ademas, ta nota cu unabes cu aproba e presupuesto, "e gobierno nobo por implementa e consecuencianan financiero di su prioridadnan di politica a traves di e prome presupuesto complementario." Pa finalisa, CAft ta indica cu ta considera cu ta "esencial pa e presupuesto keda aproba lo mas pronto posible, pero no mas laat cu dia 21 di maart 2025, y ta urgi Parlamento pa duna prioridad na su discusion."

sion."

Reaccion di presidente di parlamento

Bon Dia Aruba a tuma contacto cu presidente di Parlamento, Gerlien Croes, pa pidi comentario riba e carta di CAft. Mediante un comunicado di prensa, Croes a contesta lo siguiente: "Pa medio di e comunicado aki, Presidente di Parlamento ta informa cu dialuna dia 3 di februari 2025, Presidente di Parlamento a dirigi un carta na Gobierno di Aruba y cu un copia na e Colegio di Supervision Financiero CAft cu e recordatorio na Gobierno di Aruba cu e Nota di Contestacion (Nota naar aanleiding van het Verslag) riba e presupuesto 2025 no a wordo ricibi ainda na Parlamento di Aruba. Sin e nota aki e proceso di tratamiento di e ley REGARDANDO presupuesto di pais Aruba pa aña 2025 no por wordo inicia."

